

O filifiliga potō ma le alofa

Faimai Tuimauga (1950-2015)



O lumana'i manuia o fanau e faalagolago ia tatou filifiliga potō ma le alofa i le tapenaina mo le lumana'i. E pei lava ona a'oa'o mai le Tusi Paia, "A'oa'o le tama e tusa ma ona ala, a oo ina matua e le toe te'a ese ai."

E malie ai le autu o le lauga a le faletua o le faafeagaiga sa folafolaina le finagalo o le Atua i le tofiga a tina a le matagaluega a Manukau i le Aso Faraile 6 Fepuari, "Gugu le faatonutonu folau a matua." Sa faamamafa i le faatinoina o a tatou anavatau. E faaletonu loa a tatou filifiliga i le tapenaina o fanau mo le lumana'i, tula'i mai loa le tele o

le mau faafitauli. O a tatou filifiliga e lelei ai, o a tatou filifiliga foi e faaletonu ai. E pei lava ona tatou matauina i le tele o aiga, nuu, ekalesia ma mafutaga eseese, e sasi loa filifiliga, tula'i mai loa le le fealofani, le vevesi, ma le le galulue faatasi, ma iu ai i le malepelepe ma le ta'ape'ape.

Ua avea le tula'i mai o se ta'ita'i, ua fa'aaoga e fai ai filifiliga le alofa, e tusa lava po o ai e afaina ma tigaina ai, e faia pea e faamalie lagona auā 'o a'u o le ta'ita'i'. E matau pea ma le faanoanoa, ona o le tele o faaiuga ua fa'aaoga le agi fisaga ma le logomalie o la tatou gagana, e lu'i ai lagona ma mafaufau o le to'atele ina ia faigofie ona talia filifiliga le alofa. E faapea foi i le matagofie o a tatou tu ma aganuu o loo fusia i le alofa ma le fa'aaloalo, ua tele ina malolo ai i filifiliga faapito ma le le alofa, ona e faigata le va tapuia ma le va nonofo ai. Ona faia lava lea tusa pe oia le to'atele. Ua tauanau poo ua faamalosi le fa'aaloalo ma le fa'aeaea, ae ua le galue mo le fa'aaloalo ma le fa'aeaea pei ona ta'ua e se tasi o le ausu'esu'e i amioga a tagata.

O lenei su'esu'ega na ta'ua ai, o amioga vaaia a tamaiti e iai le mafua'aga. Afai lava e te manatu o le tamaitiiti e le amio pulea, o amioga foi na e te maua. E le fa'aaloalo foi ia te oe, ona e manatu e te le alofa ia te ia. O le mafua'aga foi lea o le tele o nai fanau e faasinolino lima i ai le to'atele, ona galo ai lava lea ma taomia le le talafeagai o filifiliga e fofo ai le faafitauli o fanau.

O le to'atele foi o nisi e ave i ai le faaaloalo ma le faatuatuaga, ua se'e ese mai le faatinoina o a tatou anavatau ma faia ni filifiliga le talafeagai, ona ne'i faitau mai le ta'ita'i o se aiga, nuu po o soo se mafutaga, ona le fiafia lea ia te ia. Ua faia le filifiliga i luga o le fia lelei, ma sona lava ta'uleleia, ae tuu ai le mea moni ma le afaina o le to'atele. Poo a lava mafutaga ma si'osi'omaga tatou te iai, a poto ma alofa filifiliga a le ta'ita'i poo i latou uma e auai, e solo lelei fuafuaga uma, ma fia silasila i ai le Atua.

E faapea foi ia tatou filifiliga faamatua, a lelei lo tatou faatonutonu folauina o fanau, tatou te maua foi ni faaiuga fiafia ma le manuia, ona faafoi ai lea o le viiga o le Atua. A'oa'o le tama e tusa ma ona ala, a oo ina matua e le toe te'a ese ai.

Ae fai mai le autu o le lauga a le faletua o le faafeegaiga a Magele i Sisifo (Seira Petaia Lokeni: 06-02-2015), Gugu le faatonutonu folau a matua. E mafua ona tele faafitauli i fanau, ona ua gugu le faatonutonu folau a matua. E taua tele le le mapu o le talatalanoa ma faatonutonu le fanau, ina ia manuia fuafuaga mo le lumana'i.

O filifiliga poto ma le alofa a le Atua na ia auina mai ai Lona alo pele e to'atasi, ina ia le fano se tasi e faatuatua ia te ia, ae ia maua e ia le ola e faavavau.

~ ~ ~ ~

O Faimai Tuimauga e le tau faailoina lana tautua mo a'oga e ta'u ai Samoa ma le Pasefika; o se faia'oga ma le faigaluega a le matagaluega o a'oga a Niu Sila; o se sui faavae o le Ulimasao, le Fagasa, ma atina'e taua'oga, faipolokalame leitio ma le nusipepa, e una'ia ai le faatauaina o le gagana Samoa a o soifua.